



LAPORAN LIPUTAN MEDIA

RABU / 16 JANUARI 2019

- 1. SEMUA PIHAK DIGESA PATUHI ARAHAN JPV, PBT**
- 2. TIADA KES JANGKITAN DI TAIPING**
 - **BERITA HARIAN**
- 3. PESAWAH MERINTIH, TIDAK DAPAT TUAI HASIL**
 - **UTUSAN MALAYSIA**

DISEDIAKAN OLEH :
CAWANGAN KOMUNIKASI KORPORAT
(MADA)

WABAK RABIES

Semua pihak digesa patuhi arahan JPV, PBT

➔ Langkah kawal, elak penyebaran jangkitan anjing gila

Oleh Shamsul Kamal Amarudin dan Zahratulhayat Mat Arif
bhnews@bh.com.my

► Ipoh

Semua pemilik anjing di daerah Larut Matang dan Selama (LMS) diminta mematuhi arahan ditetapkan Jabatan Perkhidmatan Veterinar (JPV) negeri serta pihak berkuasa tempatan (PBT) bagi mengelakkan penyebaran jangkitan anjing gila atau rabies.

Menteri Besar Perak, Datuk Seri Ahmad Faizal Azumu, berkata adalah penting untuk penduduk bekerjasama memastikan wabak itu terkawal, antara lain segera membawa anjing peliharaan masing-masing mendapatkan suntikan pelalian atau vaksin.

Beliau berkata, tindakan proaktif pemilik anjing juga dapat mengelakkan wabak itu merebak ke luar daerah yang boleh mendatangkan masalah lebih serius di negeri ini.

"Saya sudah diberi taklimat mengenai perkara ini, semalam

(kelmarin), sebelum menandatangani pewartaan LMS, termasuk bandar Taiping, sebagai kawasan jangkitan rabies.

Ambil langkah proaktif

"Pemilik anjing perlu mengambil langkah proaktif mengelakkan wabak ini menular ke kawasan lain," katanya pada sidang media selepas merasmikan Majlis Pecah Tanah Projek Perumahan Naluri Perdana Gopeng di Gopeng, dekat sini, semalam.

Kelmarin, Ketua Pengarah Perkhidmatan Veterinar, Datuk Dr Quaza Nizamuddin Hassan Nizam, dalam satu kenyataan berkata mukim Taiping dan Bukit Gantang di daerah LMS diwartakan sebagai kawasan jangkitan rabies berkuat kuasa serta-merta.

Ia susulan maklumat seorang pengadu bahawa dua ahli keluarganya digigit anjing peliharaannya di Taman Sri Kota Fasa 2, Taiping, bulan lalu, sebelum sampel otak haiwan itu diuji dan disahkan positif rabies oleh Institut Penyelidikan Veterinar, Ipoh.

Dr Quaza Nizamuddin berkata, sebanyak tiga lagi sampel anjing berkeliaran dikesan positif daripada 30 sampel diambil pada 11 Januari lalu di sekitar kawasan Tupai Business Centre dan Pekan Sri Boyan.

Mengulas lanjut, Ahmad Faizal berkata, pihaknya bimbang akan risiko kanak-kanak bermain di luar rumah, termasuk di padang permainan awam,



Pemilik anjing perlu mengambil langkah proaktif mengelakkan wabak ini menular ke kawasan lain"

Ahmad Faizal Azumu,
Menteri Besar Perak

diserang anjing yang dijangkiti rabies sehingga mereka turut diancam wabak itu.

Justeru, beliau berkata, kerjasama sedang dilakukan antara JPV negeri dengan PBT di daerah terbabit adalah penting dalam usaha memastikan pengawalan dan penguatkuasaan lebih tersusun bagi menangani wabak itu.

"Wabak ini bukan berpunca dari sini (LMS), namun ia datang dari tempat luar. Saya tidak mahu membuat tuduhan (te-tapi) sebab itu kawasan ini

(LMS) pernah dijangkiti wabak rabies dan sekarang kena lagi, jadi perlu ambil tindakan segera," katanya.

Sementara itu, Kerajaan Perak turut memberi jaminan bahawa vaksin dibekalkan kepada Jabatan Kesihatan negeri mencukupi bagi membendung wabak rabies, termasuk menangani jangkitan berkenaan di daerah LMS.

Wabak terkawal, tidak perlu panik

Pengerusi Jawatankuasa Kesihatan, Hal Ehwal Pengguna, Integrasi Nasional dan Sumber Manusia negeri, A Sivanesan, berkata justeru, masyarakat tidak perlu risau.

"Pegawai dari JPV negeri sedang bekerjasama dengan PBT untuk memastikan haiwan peliharaan terbabit diberikan vaksin," katanya ketika dihubungi, semalam.

Sivanesan berkata, penduduk juga tidak perlu panik kerana wabak itu terkawal, selain meminta kerjasama orang ramai memberikan vaksin kepada haiwan peliharaan masing-masing meliputi anjing dan kucing.

"Sekiranya digigit anjing atau kucing liar, segera dapatkan rawatan di klinik atau hospital bagi mengelak daripada dijangkiti wabak itu," katanya.

Tinjauan BH di beberapa kawasan di daerah Taiping mendapati proses vaksinasi sedang giat dilaksanakan JPV negeri terhadap semua anjing dan kucing di situ.

Tiada kes jangkitan di Taiping

Putrajaya: Tiada kes positif rabies dalam kalangan manusia dilaporkan di Taiping, Perak, setakat ini.

Menteri Kesihatan, Datuk Dr Dzulkefly Ahmad, berkata dua mangsa digigit anjing positif rabies di Taiping pada 25 Disember tahun lalu, tidak menunjukkan gejala penyakit itu.

"Kerjasama antara Kementerian Kesihatan dengan Jabatan Perkhidmatan Veterinar (JPV) sedang dilakukan untuk pelaksanaan aktiviti kawalan dan pencegahan," katanya pada si-

dang media, di sini, semalam.

Pantau rapi pintu masuk

Kelmarin, mukim Taiping dan Bukit Gantang di daerah Larut Matang dan Selama (LMS), Perak, diwartakan sebagai kawasan jangkitan rabies susulan empat sampel diambil di kawasan itu didapati positif wabak itu.

Sementara itu, mengulas mengenai penularan wabak Chikungunya, Dr Dzulkefly berkata, pemantauan di pintu masuk antarabangsa antara Malaysia, Thailand, Singapura dan Indo-



Kita sedia mempertimbangkan kerana mengetahui kepentingan udara yang sihat untuk semua,"

Dr Dzulkefly Ahmad,
Menteri Kesihatan

nesia diperkukuhkan dengan kaedah saringan suhu badan untuk mengesan kes disyaki Chikungunya daripada pelawat yang memasuki negara ini.

Berhubung cadangan memperluaskan larangan merokok di pejabat atau tempat kerja pula, beliau berkata, kementerian terbuka untuk mempertimbangkan pelbagai cadangan berhubung perkara itu.

"Kita sedia mempertimbangkan kerana mengetahui kepentingan udara yang sihat untuk semua," katanya.

Pesawah merintih, tidak dapat tuai hasil



Oleh **MOHD. HAFIZ ABD. MUTALIB**
utusanperlis@utusan.com.my

■ ARAU 15 JAN.

OKTOBER tahun lalu, ketika mula mengusahakan tanaman padi di kawasan seluas tiga hektar di Kampung Sungai Baru Tengah, Simpang Empat di sini, **Abdul Hamid Mat**, 66, menyimpan hasrat membawa isteri serta cucunya menunaikan ibadat umrah dan ziarah di Mekah apabila memperoleh wang hasil daripada tanaman berkenaan, dijangka bulan depan.

Warga emas itu, sudah berkira-kira hasil tanaman itu nanti yang dianggarkan bernilai RM18,000 cukup untuk menampung perjalanan mereka di samping merealisasikan harapan cucunya yang begitu teringin menjejak kaki ke tanah suci itu.

Bagaimanapun hasrat **Abdul Hamid** itu tidak kesampaian apabila seluruh tanamannya musnah sama sekali berikutan



ABDUL HAMID MAT (kanan) menunjukkan tanaman padi yang rosak di Kampung Sungai Baru Tengah, Simpang Empat, Arau, Perlis, semalam.

masalah padi angin dan lebih malang dia juga mengalami kerugian lebih RM6,000 melibatkan modal awal ketika proses tanaman sebelum ini.

Selain **Abdul Hamid**, kira-kira 3,000 pesawah lain di kawasan Simpang Empat juga berdepan dengan masalah sama dan mengalami kerugian ratusan ribu

ringgit untuk musim ketiga berturut-turut.

Katanya, dia cukup kecewa apabila sekali lagi tidak dapat menuai hasil akibat masalah padi angin.

"Sepatutnya duit padi itu nanti akan digunakan untuk membawa isteri dan cucu ke Mekah pada bulan depan namun hasrat

tersebut terpaksa ditunda.

"Cucu saya yang berusia 10 tahun itu begitu teringin hendak menziarahi tanah suci Mekah. Saya berharap pihak bertanggungjawab mencari kaedah terbaik untuk menyelesaikan masalah padi angin yang berulang setiap tahun.

"Kita sudah tanam padi

mengikut segala prosedur dan menggunakan baja, benih, racun yang disediakan Lembaga Pertanian Muda namun masalah sama tetap berulang," katanya ketika ditemui di sini hari ini.

Seorang lagi pesawah, **Rosli Sirun**, 66, berkata, dia yang mengusahakan tanaman padi miliknya seluas 1.5 hektar terpaksa menerima hakikat apabila keseluruhan tanamannya musnah pada tahun ini.

"Sekurang-kurangnya kalau dapat duit padi nanti boleh digunakan untuk menukar bumbung rumah yang telah rosak. Nampaknya hasrat itu perlu ditangguhkan dahulu," katanya.

Sementara itu, bekas Pengerusi Pertubuhan Peladang Simpang Empat, **Arof Saad** meminta Kementerian Pertanian dan Industri Asas Tani menyalurkan bantuan kepada petani yang terlibat dengan musibah padi angin.

"Kebanyakan mereka menanggung kerugian besar malah ada dalam kalangan pesawah juga langsung tidak memperoleh hasil. Kita juga minta pihak bertanggungjawab membuat kajian dan mencari jalan menyelesaikan masalah pada angin," katanya.

